

26. Maj 2015

Inatsisartut suleriaasianni § 36 naapertorlugu matumuuna apeqquteqaat aallavigalugu oqallittoqarnissaannik siunnersuut manna siunnersuutigaara:

**Meeqqat illugiimmik angajoqqaaminnik takunninnissaannut pisinnaatitaaffeqarnera naapertorlugu, tamannalu meeqqamut pitsaanerussappat, qanoq ililluta Inatsisartuni pilersarusiuussisarnermut pitsanngorsaaqataasinnaavugut. Taamatutaaq ataataasut meeqqaminnik attavigissaarnerunissaannut pitsaanerusunik periarfissiissagutta meeqqaminnik tigummiqarsinnaanerat eqqarsaatigalugu ilaqutariit pillugit inatsisaatigut qanoq nutarterisinnaavugut. Aaqqiagiinngittoqartillugu isumaqatigiissitsiniarnissanut periarfissaqarnerunissaq, taamatullu meeqqap peqatiginissaagaluanik eqquutitsisoqanngippatiliuseqarnissamat periarfissiinissat Inatsisartuni sulissutigisariaqarpagut.**  
(Inatsisartunut ilasortaq Aaja Chemnitz Larsen, Inuit Ataqtigiit)

Inuit Ataqtigiit oqallinnissamik siunnersuuteqarlutik saqqummiussaannut qujalluta Siumumiit ima oqaaseqassaagut.

Nunarsuatta uumassuseqarluni ingerlaartuarneranut tunngaviit pingaarnersarisaat tassaavoq meeqqat. Meeqqat tamatta ajunnginnerpaamik inuuneqarlutillu avatangiiseqarlutik peroriar-tornissaannik kissaateqarfiguakkagut, ajunnginnerpaanillu avatangiiseqarlutik tunngavissin-eqarlutillu peroriartornissaannik tamatta neriuteqarfigisavut.

Inuunerullu unammilligassarpasui inuunermut tikilluaqqusaanermiit tamatsinnut minnermik annermilluunniit atugassaqartitsiuartut aamma tassaapput inuunerup ilisarnaatai sanileriillu-tik ingerlaqatigiittuurtussat tassa oqitsorsiorneq, unammillerneqarnerlu.

Inuit ataasiakkaat inuunerannut isiginnittaaserput upperisarpullu tassaavoq inuk inunnguutsi-mini isumatusaartuusooq tamatigut ajunngitsussamik siunnerfeqarnermigut unamm illigassa-minik imminut avatangiiserisaminullu ujarlertuartoq. Pisortat sunut tamanut tamakkiisumik

pisussaaffeqartinnerisa akisussaaffeqartinnerisalu kingunerikkajuttarpaa arlaatigut eqquisoqartillugu suut tamarmik kalluarneqartarneri.

Killiffitta oqariartorfigiuarpaatigut inuttut ataasiakkaatut akisussaaffimmik tigusinerusariaqarnitsinnik ataasimoorlutalu kivitseqatigiittariaqarnitsinnik, sutigut tamatigut pisortanik isumalluuteqarnissaq ujartunngikkaluarlugu.

Ilaqutariit imminnut tatigisut imminnullu pilersornissaminnut periarfissaginnerusut politikikkikut siunnerfiusariaqarpoq avaqqunneqarsinnaanngitsoq. Upperaarput inuiaqatigiit peqqissut aamma tassaasut sanngiinnerusortaminnut pitsaasunik atugassaqartitsisut taanna apeqquserneqarsinnaanani qitiuvoq.

Sutigulli tamatigut pisortanik isumalluuteqarpallaarneq sapinngisamik minnerpaaffimminiittariaqarpoq, soorlu matumap oqallisissiap qiterisaa taamaattoq, tassa ilaqutariinni meerartalinni isumaqatigiinngittoqartillugu isumaqatigiisitsiniaasartumik pisortat peqarnissaannik oqariartuuteqarneq.

Taamak naatsumik Siumumiit oqaaseqarluta oqallilluarnissamik kissaassivugut.

Vivian Motzfeldt - Siumut